

及余得請歸里將母又十年所無何苦塊餘息中公孫文學藻自高陽寄聲不孝有曰從來乞言

難爲先公乞言尤難若夫品行事業文章其一人一出於真而不獲其言以光先集是藻生平一大闕

失也惟先生序之余未敢任時友人楊廣生鐸高邑仰止先生復致余諄切又越三年所余罷讀禮

廼出所寄家刻五種詳披閱焉得睹大學士李坦園先生所構先生全集續集兩序始豁然曰曩固

謂嘗厥一齋茲卽非全鼎其鼎中之椒馨津津有味乎其言之也計公先後著述亾慮數百卷其得

梓者卷僅五十許雖猶未與目然披覽文學所續上下二卷若序記誌誄及雜著之微言緒論藻語

韻辭與古風近體諸詩靡不本英分攄雄才卽文章寓經濟無隻字單句不高步古作者之林而究

無泥乎古者是乃深於古今是以髣髴先生全集或庶幾有當於萬一然余固猶執一齋以槩全鼎

且終未敢任屬序意也嗟乎先生以名甲第歷將相方瑤焰張甚獨不匪比不東林介然孤立以身

係一代安危三十餘年孟氏所謂豪傑非歟余謬於頌詩讀書之餘論及其世如此餘詳具孫徵君

所爲墓誌與大學士魏栢鄉先生所撰墓表中